

# 恩典 ê 主

雖然我會 tú 著艱苦、試煉、挑戰，甚至會痛苦，對上帝埋怨，失去信心，總是伊並無棄 sak-- 我，顛倒 hō 我 ná 成長，活出豐盛 ê 性命。

► 蔡瑋琳 | 中山醫學大學台文系應屆畢業生

**我**想起家已有真 chē 代誌，攏是上帝 teh 引 chhōa，才有法度平安活佇這個世間。我欲 kap 恁分享佇大學時期「上帝 ê 恩典真正夠我用」。

## 佇大學得著成長

細漢 ê 時，我佇快樂 ê 基督徒家庭成長，逐禮拜攏愛去教會參加主日學、禮拜，教會 ê 生活成做我真慣勢 ê 行動。到佇大學 ê 時，聽父母 ê 話來台中 chhōe 教會、chhōe 團契，我 ê 生活重心除了學校就是教會、團契。佇大學這個時期，我漸漸發現家已以前真少有想法，信仰嘛無 khiā 在。到佇大學，因為接觸 ê 環境 hō 我受造就，我心中定有足 chē ê 疑問，hō 我有真 chē 思考 ê 機會，hō 我成長，hō 我想 koh khah chē 上帝佇我身上 ê 恩典。

講有奇妙，真正是有影真奇妙。上帝 hō 我成長佇教會家庭，對生活中內化我 ê 思想，雖罔現在無真大 ê 挑戰 kap 試煉，抑 m-koh 上帝 hō 我平安，賜恩典 hō 我，就是我 ê 見證。

佇團契生活中，我得著真 chē 寶貴 ê 物件，上帝佇我身上動工，hō 我改變真 chē，hō 我 chit-má 會當有時仔佇主日學彈鋼琴、教主日學等，kiám-chhái koh 有真 chē 愛學習 ê 所在。m-koh 回想過去 ta<sup>n</sup>-á 來台中 ê 時，啥物攏 bē 曉，鋼琴 kan-ta<sup>n</sup> 會曉彈單音，koh 定定彈 m-tiòh 音--去，經過練習，有進步真 chē--a！因為細漢學過一點仔琴，就家已 hoah 講無愛學--a，上帝透過我大學時代 ê 服事，koh 一擺 hō 我彈鋼琴 ê 才能，chhōe 倒轉對音樂 ê 興趣，磨練我 ê 琴藝，hō 我服事上帝。

## 參加教育營活動

Koh 來，上帝 hō 我佇大學第一個寒假，就去參加教育營，佇原住民部落去輔導 in ê 功課，教小朋友，傳福音 ê 種子。佇 hia 蹠一禮拜久，kap 無全學校 ê 大學生做夥了後，hō 我深深體會，是我去學習著團體之間互相服事 ê 同心，koh 體會上帝創造美好 ê 大自然，kap 原住民仔純真 ê 笑容 kap 心思。這也 hō 我想著馬太福音18章3節講：



>> 佇原住民部落服事，互我（左一）深深體會上帝創造美好 ê 大自然，kap 原住民團仔純真 ê 笑容。  
（圖·台中大專學生中心提供）

「恁若無 oát 轉來成做親像細漢团--ê，決斷 bōe 入天國。」（謙卑親像細 kián）

佇上帝 ê 引 chhōa，我到 ta<sup>n</sup> 逐擺攏有去教育營，嘛逐擺 hō 我真 chē 挑戰家己 ê 代誌。對真 chē bē 曉 ê 事工，hō 我累積經驗，裝備家己，kiám-chhái 有時陣人會軟弱，想欲逃避，koh ná 做 ná 無氣力，m̄ 知欲按怎 ê 時，我定定攏會想著一句話：「上帝 bōe hō 咱超過咱所會當承受--ê。」這句話 hō 我真大 ê 信心，雖然我會 tú 著艱苦、試煉、挑戰，甚至會痛苦，對上帝埋怨，失去信心，定定我若想起這句話，我就會有勇氣，擔起這個重擔，繼續努力 phah 拚。上帝伊奇妙 ê 聖手保護我，伊用話 kā 我講，伊並無棄 sak-- 我，是欲 hō 我 ná 成長，活出豐盛 ê 性命，hō 我佇大學生活有真 chē 回憶。

## 上帝會成就一切

上帝 ê 恩典真正是夠我用，佇學校生

活、課業、教會服事（夏令營、主日學），大專中心 ê 活動頂 kōan，有新鮮營、教育營、音樂營、神研班等，上帝攏會差派天使佇我 ê 身軀邊幫贊--我，hō 我順利度過難關，透過同工互相 ê 關心 kap 鬥相 kāng，是我佇患難中即時 ê 幫贊。

雖然大學生活猶 bē 過了，m̄-koh 時間也過了真緊，佇台中也三、四冬--a！我經歷真 chē 代誌，猶 koh 有真濟目標想欲去完成（教檢、讀《聖經》），雖罔我佇課業上猶 bē 有足大 ê 成就，m̄-koh 佇以弗所書3章20節講：「上帝會照運行佇咱心內 ê 大力，充足足 ê 成就一切，超過咱所求所想--ê。」上帝 hō 咱有自由意識會當選擇人生 ê 道路，m̄-koh 也求主保守我 ê 心思意念，遵趁上帝 ê 旨意，贏過一切 ê 試煉。佇我人生 ê 道路，我期待家己 m̄ 是靠我 ê 能力去解決問題，乃是靠主賞賜 ê 恩典、恩賜 kap 心思意念來成就一切。🌍